



Anggota Hazmat mengambil sampel bacaan di dalam tong biru dalam parit berhampiran SMK Tanjung Puteri Resort, Pasir Gudang, semalam.

**PENCEMARAN DI PASIR GUDANG**

# Penduduk jumpa tong biru dipercayai berisi bahan kimia

→ Dakwa kandungan sisa toksik mengalir ke Sungai Sembilang

Oleh Mohamed Farid Noh  
farid\_noh@bh.com.my

► Pasir Gudang

**P**enduduk Taman Tanjung Puteri Resort di sini gempar dengan penemuan beberapa tong biru dipercayai berisi sisa bahan kimia, di Sungai Sembilang, kira-kira dua kilometer dari Sungai Kim Kim.

Tong terbabit ditemui kira-kira 500 meter dari Sekolah Menengah Kebangsaan (SMK) Tanjung Puteri Resort, salah satu daripada 111 sekolah di sini yang diarah ditutup sementara sejak Rabu lalu.

Tinjauan media di kawasan berkenaan sebaik dimaklumkan penduduk mendapati ada beberapa tong biru dipercayai berisi sisa kimia dibuang di bawah jambatan yang menghubungkan Taman Tanjung Puteri ke Taman Pasir Putih.

**Mengalir dalam sungai**

Seorang penduduk, Ahmad Roh Ariffin, mendakwa kandungan tong yang dipercayai sisa toksik itu sudah mengalir ke dalam Sungai Sembilang dan mengeluarkan bau yang tidak menyenangkan.

"Kemunculan tong biru itu disedari penduduk sejak Khamis lalu dan sudah dila-

porkan kepada pihak berkuasa, namun tiada tindakan diambil.

"Penduduk bimbang kerana boleh menghidu bau busuk seperti cuka, apatah lagi ada yang mengadu sesak nafas dan mual.

"Kami berharap pihak berkuasa menyiasat kemunculan tong biru ini kerana isu pencemaran Sungai Kim Kim pun belum selesai," katanya kepada pemberita, semalam.

Dua anggota polis dilihat sudah menutup kawasan berkenaan dengan pita garisan kuning polis dan tidak membenarkan media dan orang ramai mendekati kawasan berkenaan.